

Nguvu ya Upendo wa Mungu

Mjue sana Mungu, ili uwe na amani; Ndivyo mema yatakavyokuja—Ayubu 22:21.

Yesu alisema: “Baba mwenyewe awapenda.” Ikiwa imani zetu zimekazwa kwa Mungu, kupitia kwa Yesu, itathibitisha “kama nanga ya roho, yenye salama, yenye nguvu, iingiayo hata mle mlimo ndani ya pazia.” Ni kweli kwamba kuvunjwa moyo kutakuja; lazima tutarajie majonzi; lakini tunalazimika kusalimisha kila kitu kwa Mungu, kiwe kikubwa au kidogo. Hawezi kutatizwa na kuongezeka kwa machungu wala kushindwa na uzito wa mizigo yetu. Ulinzi Wake unaenea kwa kila kaya na kumstawisha kila mtu; Anajishughulisha sana na matatizo na huzuni zetu zote. Anazingatia kila chozi; anaguswa na kila hisia ya madhaifu yetu. Mateso na majaribu yote yanayotupata hapa yameruhusiwa, kukamilisha makusudi Yake ya upendo kwetu, “ili tuushiriki utakatifu Wake,” na hivyo kuwa washiriki katika ule ukamilifu wa furaha ambayo inapatikana katika uwepo Wake....

Biblia kwa maneno thabiti huweka mbele yetu umuhimu wa kupata kumjua Mungu. Petro anasema: “Neema na iwe kwenu na amani iongezwe katika *kumjua Mungu* na Yesu Bwana wetu.” “Kwa kuwa uweza wake wa Uungu umetukirimia *vitu vyote* vipasavyo uzima na utauwa, *kwa kumjua Yeye* aliyetuita kwa utukufu wake na wema wake mwenyewe.” Na Maandiko yanatusihi: “Mjue sana Mungu, ili uwe na amani.”

Mungu ametuamuru, “Mtakuwa watakatifu; kwa kuwa mimi Bwana, Mungu wenu, ni Mtakatifu,” na mtume aliyevuviwa anatangaza kwamba pasipo utakatifu “hapana mtu atakayemwona Bwana.” Utakatifu ni mapatano na Mungu. Kwa dhambi sura ya Mungu kwa mwanadamu imeharibiwa na kukaribia kuondoshwa kabisa. Kazi ya injili ni kurejesha kile ambacho kilikuwa kimepotea na tunapaswa kushirikiana na wakala wa Mungu katika kazi hii. Na ni kwa jinsi gani tunaweza kufikia mapatano na Mungu, tunawezaje kupokea mfano Wake, tusipopata kumjua Yeye? Ni huku kumjua ambako Yesu alikuja ulimwenguni ili kutufunulia.

Ufahamu mdogo ambao wengi sana wamekuwa nao juu ya tabia tukufu na cheo cha Yesu vimedhoofisha uzoefu wao wa kidini na kwa kiasi kikubwa wamezuia ukuaji wao katika maisha matakatifu. Dini binafsi miongoni mwetu kama watu iko katika hali duni mno. Kuna dini ya mtindo zaidi, ya urasimu zaidi na ya ulimini tu; lakini dini thabiti na imara lazima iletwe katika uzoefu wetu wa kidini.... Kile tunachohitaji ni kumjua Mungu na nguvu ya upendo Wake, kama ilivyofunuliwa katika Kristo, kwa ufahamu halisi. Lazima tuyachunguze Maandiko kwa bidii, kwa maombi; lazima uelewa wetu uhuishwe na Roho Mtakatifu na mioyo yetu lazima iinuliwe kwa Mungu katika imani na tumaini na kuendelea kuimba sifa (Testimonies for the Church 5:742-744).